

# In mazzament a Tavau ha laschè tremblar il mund

DA JOHANN ULRICH SCHLEGEL

■ **Avant 75 onns, ils 4 da favrer 1936, ha il student jugoslav David Frankfurter assassinà a Tavau il Tudestg Wilhelm Gustloff. L'attentader ha giustifigà l'omicidi cun motivs ch'èn era fruntads sin chapientscha.** Sco dus malsaus che s'avischinan en in tempo nar, senza misericordia ed a moda fatala en furma da duas glischs persas en la stgrenta notg da l'univers dals milliuns d'umans, per alura collidar orriblamain in cun l'auter ed ir en tocca: uschia sa preschentan quests dus acturs da l'istorgia europeica dals onns 1930. In ha pers andetgamain la vita cun ses far e demanar, l'auter è vegnì condemnà ad in chasti da chasaforz da plirs decennis. In è sa revelà sco rassist fanatic che ha discredità fermamain il pievel da l'assassin, l'auter però n'ha betg mo vinditgà e defendì ses pievel, el ha era prendì vendetga per motivs fitg persunals ed egoistics.

## In pazient da tumor cunter in malsau dal pulmun

Wilhelm Gustloff ha terminà in emprèndissadi sco commerziant da banca. Sin fundament d'ina greva malsogna dal pulmun è el dentant stà uschè handicapà ch'el n'ha betg pudì lavorar regularmain ed è la finala ì a star a Tavau per profitar dal clima alpin che ha levgià sias suffrientschas.

Per chattar in'occupaziun ha el fatg politica e quella era da quel temp en la

civilisaziun occidental per gronda part dretga, daventava pli e pli radicala, gea schizunt rassistica a moda maligna. Il mender era l'odi rassistic cunter ils Gidieus. E precis Gustloff è sa mussà en Svizra sco represchentant extrem da l'antisemitissem tudestg da quella giada; el è stà responsabel per las publicaziuns manzegnusas e malvulentas cunter ils Gidieus. Dapi l'onn 1932 è el stà manader da la secziun naziunala da la Partida dals lavurers naziunalsocialistica tudestga (NSDAP) en Svizra.

David Frankfurter da l'autra vart era il figl d'in grond rabin dal reginavel da la Jugoslavia da lez temp. Er el era grev malsau dapi la naschientscha. El aveva in tumor da l'ossa. Tuttina èsi reussì a Frankfurter da studegiar a partir dal 1929 medischina a Vienna e Leipzig. Ins na po però betg accentuar ferm avunda ch'i regiva da quellas uras – e quai vegn deplorablamain gugent taschentà enfin oz – en vastas gruppas da tut las classes da la populaziun e gist en l'ambient academic in antisemitissem insupportabel. U ditg curtamain: Frankfurter è exposat perfin en l'auditori universitar a las mendras insultas, gea schizunt a persecuziuns.

Il favrer 1936 sesa el la finala en il tren, viagescha tras il Partenz invernàl vers Tavau, scalina vi da l'isch-chasa da Gustloff e schluppetta quel giu dal flatg.

## Opiniuns oppostas u la pussanza da las relaziuns

L'agitaziun che va tras la pressa mundia-



Avant 75 onns ha il student jugoslav David Frankfurter assassinà a Tavau il Tudestg Wilhelm Gustloff.

la è enorma. Datti circumstanzas mitigiantas? Sa tracti d'in tirannicidi che fiss perdunabel?

Il grond e renomà scriptur Emil Ludwig s'engascha per Frankfurter. Ses ple-doyer vegn beneventà en tut il mund. Sulettamain la pressa da la Germania instighescha sin il pli aut grad, gea schizunt ils circuls gidieus en Germania sa distanzieschan da las intercessiuns. Er en Svizra refus'ins per gronda part il malfatg. Davos quel sa cuntegnair sa zuppa, quai ch'è chapaivel, la tema dals naziunalsocialists gist sco tar la populaziun gidieua en Germania. Il Reich Tudestg da quella giada ha stilisà Gustloff al martir. Tenor el è vegnì numnà in dals pli gronds bastiments da passagiers tudestgs. Hitler ha battegià en preschientscha da la vaiva da Gustloff, ch'è stada pli baud la secretaria da Hitler, il bastiment sin il num «Wilhelm Gustloff». Ma la disfortuna porta uschè savens nova disfortuna. Ils 30 da schaner 1945, en ina da las pli terriblas catastrofes nauticas da l'istorgia mundiala, ha il bastiment «Wilhelm Gustloff» fatg naufragi cun var 10 000 passagiers sunter in bumbardament violent d'in sutmarin russ.

Ma l'onn 1945 va er a fin il temp d'orror da la Germania. Qua sa mussa co che la justia è uschè savens exposa a forzas surpussantas. Adolf Hitler è mort. Il privel è passà. E qua po il chantun Grischun tuttenina conceder dalunga amnestia a Frankfurter. El vegn relaschè da la chasaforz e va en Palestina, l'Israel dad oz.